

三輔黃圖卷之四

苑囿

周靈囿文王囿也詩曰王在靈囿麀鹿攸伏麀鹿濯濯白鳥嚶嚶毛萇注曰囿所以域養禽獸也天子百里諸侯四十里靈者言文王之有靈德也靈囿言道行於苑囿也孟子曰文王之囿方七十里芻蕘者往焉雉兔者往焉與民同其利也文王靈囿在長安縣西四十二里

云一本作四十二里

漢上林苑即秦之舊苑也漢書云武帝建元三年開上林苑東南至藍田宜春鼎湖御宿昆吾宛南山而西至長楊五柞北繞黃山瀕渭水而東周袤三百里離宮七十所皆

三輔黃圖卷之四

容千乘萬騎漢宮殿疏云方三百四十里漢舊儀云上林苑方三百里苑中養百獸天子秋冬射獵取之帝初修上林苑羣臣遠方各獻名果異卉三千餘種植其中亦有製為美名以標奇異茂陵富民袁廣漢藏鏹巨萬家僮八九百人於北山下築園東西四里南北五里激流水注其中構石為山高十餘丈連延數里養白鸚鵡紫鴛鴦犛牛青兕奇獸珍禽委積其間積沙為洲嶼激水為波濤致江鷗海鶴孕雛產殼延漫林池奇樹異草靡不培植屋皆徘徊連屬重閣修廊行之移晷不能徧也廣漢後有罪誅沒入為官園鳥獸草木皆移入上林苑中上林苑有昆明觀武帝置又有蘭觀平樂觀遠望觀燕昇觀觀象觀便門觀白

沅案玉海引作四十里注

鹿觀三爵觀陽祿觀陰德觀鼎郊觀樛木觀椒唐觀魚鳥  
觀元華觀走馬觀柘觀上蘭觀郎池觀當路觀皆在上林  
苑又舊儀曰上林有令有尉禽獸簿記其名數又有上林  
詔獄主治苑中禽獸宮館之事屬水衡又上林苑中有六  
池市郭宮殿魚臺犬臺獸圈

甘泉苑武帝置起仙人觀

沅案舊本皆無起仙人觀四字  
從初學記太平御覽長安志加

緣山谷行至雲陽三百八十一里

沅案太平御覽長安志  
俱作三百八十里無一

宇西人扶風

沅案初學記太平御覽  
長安志俱作入右扶風

凡周回五百四十里

沅案玉海作四百五十里  
太平御覽仍作五百四十苑中起宮殿臺閣百餘所有仙  
人觀石闕觀封巒觀鳩鵲觀

御宿苑在長安城南御宿川中漢武帝為離宮別館禁禦

三輔黃圖卷之四

人不得入往來遊觀止宿其中故曰御宿三秦記云御宿

園出栗十五枚一勝大梨如五勝落地則破其取梨先以

布囊承之號曰含消此園梨也

思賢苑孝文帝為太子立思賢苑以招賓客苑中有堂室

六所

沅案玉海引  
作堂皇六所

客館皆廣廡高軒屏風幃褥甚麗廣陵

王胥有勇力常於別園學格熊後遂能空手搏之莫不短  
脰後為獸所傷陷腦而死

博望苑武帝立子據為太子為太子開博望苑以通賓客

漢書曰武帝年二十九乃得太子甚喜太子冠為立博望

苑使之通賓客從其所好又云博望苑在長安城南杜門

外五里有遺址

西郊苑漢西郊有苑園林麓藪澤連亘繚以周垣四百餘里離宮別館三百餘所

三十六苑漢儀注太僕牧師諸苑三十六所分布北邊西邊以郎為苑監宦官奴婢三萬人養馬三十萬匹養鳥獸者通名為苑故謂之牧馬處為苑

樂遊苑在杜陵西北宣帝神爵三年春起

宜春下苑在京城東南隅元帝紀注東南隅曲池是

梨園雲陽宮記曰雲陽車箱坂下有梨園一頃梨數百株

沅案太平御覽引作樹數百株青翠繁密望之如車蓋

### 池沼

周文王靈沼在長安西三十里詩曰王在靈沼於物魚躍

三輔黃圖卷之四

漢昆明池武帝元狩四年穿在長安西南周回十里西南

夷傳曰天子遣使求身毒國市竹身毒國即天竺也漢書曰張騫言使大夏時見

蜀布邛竹杖問所從來曰從東來身毒國可數千里得蜀賈人市而為昆明所閉天子欲

伐之越嵩昆明國有滇池方三百里故作昆明池以象之

以習水戰因名曰昆明池漢書曰元狩三年滅隴西北地

此池食貨志曰時越欲與漢用船戰逐水戰相逐也乃大修昆

明池也三輔舊事曰昆明池地三百三十二頃沅案玉海此句下有

注云一作灌地中有戈舩各數十樓舩百艘舩上建戈矛

沅案玉海引作有百艘樓舩上建樓櫓戈舩各數十上建戈矛四角悉垂幡旄沅案玉海引無此旄

葆麾蓋照燭涯涘圖曰上林苑有昆明池周匝四十里

廟記曰池中復作豫章大舩可載萬人上起宮室因欲遊

戲養魚以給諸陵祭祀餘付長安厨三輔故事又曰池中  
有豫章臺及石鯨刻石爲鯨魚長三丈每至雷雨常鳴吼  
鬣尾皆動一說甘泉宮南有昆明池池中有靈波殿皆以  
桂爲殿柱風來自香又曰池中有龍首船常令宮女泛舟  
池中張鳳蓋綉鳳爲飾建華旗作權歌權歌權發歌也又曰雜權歌謳舟人歌也  
以鼓吹帝御豫章觀臨觀焉關輔古語曰昆明池中有二  
石人立牽牛織女於池之東西以象天河張衡西京賦曰  
昆明靈沼黑水元址牽牛立其右織女居其左今有石父  
石婆神祠在廢池疑此是也武帝初穿池得黑土帝問東  
方朔東方朔曰西域胡人知乃問胡人胡人曰劫燒之餘  
灰也三秦記曰昆明池中有靈沼名神池云堯時治水嘗  
停船於此池通白鹿原原人釣魚綸絕而去夢於武帝求  
去其鈎三日戲於池上見大魚銜索帝曰豈不穀昨所夢  
耶乃取鈎放之間三日帝復遊池池濱得明珠一雙帝曰  
豈昔魚之報耶

鎬池在昆明池之北卽周之故都也廟記曰長安城西有  
鎬池在昆明池北周匝二十二里沅案玉海作二十一里漑地三十

三項史記曰秦始皇帝三十六年使者從關東夜至華陰  
縣平舒道有人持璧遮使者曰爲吾遺鎬池君因言曰今  
年祖龍死使者問其故忽不見置其璧去使者奉璧具以  
聞始皇默然良久曰山鬼不過知一歲事退言曰祖龍者  
人之先也祖始也龍者人主之象謂始皇也使御府視璧乃二十八年渡

江所沈璧也

滄池在長安城中舊圖云未央宮有滄池言池水蒼色故

曰滄池

太液池在長安故城西建章宮北未央宮西南太液者言

其津潤所及廣也關輔記沉案長安志引作關中記云建章宮北有池

以象北海刻石為鯨魚長三丈漢書曰建章宮北治大池

名曰太液池中起三山以象瀛洲蓬萊方丈刻金石為魚

龍奇禽異獸之屬瀛洲一名竟洲亦曰環洲有樹名影木

直上於雲中有青瑤瓦覆之以避風雨有金鑿之觀飾以瓊玉

之狀懸火精為日刻黑玉為鳥以水精為月青瑤為蟾兔

於地下為機是以則昏明不虧弦望有香風冷然而至有

草名芸苗狀如菖蒲食葉則醉食根則醒有鳥如鳳身紺

翼丹名曰藏珠每鳴翔而吐珠累斛仙人以珠飾仙裳蓋

輕而耀於日月也蓬萊山亦名防邱亦名雲東高二萬里

廣七萬里水淺有細石如金玉得之不加陶冶自然光淨

仙者服之東有鬱夷國時有金霧諸仙說北上常浮轉低

昂有如山上架樓室向明以開戶牖及霧歇滅戶皆向北

有浮雲之幹葉青莖紫子大如珠有青鸞集其上下有砂

磔細如粉柔風至葉幹翻起拂細砂如雲霧仙者來觀而

戲焉風吹竹葉聲如鍾方丈之山一名巒維東方龍場方

千里瑤玉為林雲色皆紫上有通霞臺西王母常遊於其

上常有鸞鳳鼓舞如琴瑟和鳴三山統名崑邱亦曰神山

上有不死之藥食之輕舉武帝信仙道取少君藥大妄誕

之語多起樓觀故池中立廟記曰建章宮北池名太液周

三山以象蓬萊瀛洲方丈回十頃有采蓮女鳴鶴之舟又按三輔舊事云日出暘谷

浴於咸池至虞淵即暮此池象之也昭帝始元元年春黃

鵠下建章宮太液池成帝常以秋日與趙飛燕戲於太液

沙棠木造

池以沙棠木為舟舟不沈溺以雲母飾於鸞首一名雲舟

又刻大桐木為虬龍彫飾如真來雲舟而行以紫桂為柁

榭及觀雲棹水玩擷菱葉帝每憂輕蕩以驚飛燕命飲飛之士以金鎖纜雲舟於波上每輕風時至飛燕殆欲隨風入水帝以翠縷結飛鷺之裾常恐曰妾微賤何復得預結纓裾之遊今太液池尚有避風臺卽飛燕結裾之處

唐中池周回二十里在建章宮太液池之南

百子池戚夫人侍兒賈佩蘭後出爲扶風人段儒妻說在宮內時見戚夫人侍高祖嘗以趙王如意爲言而高祖思之幾半日不言歎息悽愴而未知其術使夫人擊筑高祖歌大風以和之七月七日臨百子池作于闐樂樂闋以五色縷相羈謂之相連愛八月四日出雕房北戶竹下圍棊勝者終年有福負者終年疾病取絲縷就北斗星辰求長命乃免正月上辰出池邊盥濯食蓬餌以祓妖邪三月上巳張樂於池上

十池上林苑有初池糜池牛首池蒯池積草池東陂池西陂池當路池犬臺池郎池牛首池在上林苑中西頭蒯池生蒯草以織席西陂池郎池皆在古城南上林苑中陂郎二水名因爲池積草池中有珊瑚樹高一丈二尺一本三柯上有四百六十二條南越王趙佗所獻號爲烽火樹至夜景常煥然

少府飲飛外池漢儀注飲飛具繒繳以射鳧鴈給祭祀故

有池

元帝紀沅案一本有此三字

秦酒池在長安故城中廟記曰長樂宮中有魚池酒池池

上有肉炙樹秦始皇造漢武行舟於池中酒池北起臺天子於上觀牛飲者三千人又曰武帝常欲夸羌胡飲以鐵盃重不能舉皆抵牛飲西征賦云酒池監於商辛追覆車而不悟

影娥池武帝鑿池以翫月其旁起望鵲臺以眺月影入池中使宮人乘舟弄月影名影娥池亦曰眺蟾宮

琳池昭帝元始元年穿琳池廣千步池南起桂臺以望遠東引太液之水池中植分枝荷一莖四葉狀如駢蓋日照則葉低蔭根莖若葵之衛足名曰低光荷實如元珠可以飾佩花葉難萎芬馥之氣徹十餘里食之令人口氣常香益脉治病宮人貴之每遊燕出入必皆含嚼或剪以爲衣或折以障日以爲戲弄帝時命水嬉遊燕承日士人進一豆槽帝曰桂楫松舟其猶重朴况乎此槽可得而乘耶乃命以文梓爲船木蘭爲柁刻飛燕翔鷁飾於船首隨風輕漾畢景忘歸起商臺於池上

鶴池在長安城西盤池在西北並廢

冰池在長安西舊圖云西有彪池亦名聖女泉蓋冰彪聲相近傳說之訛也